

四庫全書

集部

欽定四庫全書

唐宋八大家文鈔卷八十七

明 茅坤 撰

臨川文鈔七

記

虔州學記

荆公文往往好為深遠之思適婉之調然亦思
或入於渺而調或入於詭須細詳得之

虔於江南地最曠大山長谷荒翳險阻交廣閩越銅鹽之販道所出入椎埋盜奪鼓鑄之姦視天下為多慶厯中嘗詔立學州縣虔亦應詔而卑陋褊迫不足為美觀州人欲合私財遷而大之矣然吏常力屈於聽獄而不暇顧此凡二十一年而後改築於州所治之東南以從州人之願蓋經始於治平元年二月提點刑獄宋城蔡侯行州事之時而考之以十月者知州事錢塘元侯也二侯皆天下所謂才吏故其就此不勞而齋祠講說

候望宿息以至庖湍莫不有所又斥餘財市田及書以待學者內外完善矣於是州人相與樂二侯之適已而來請文以記其成余聞之先王所謂道德者性命之理而已其度數在乎俎豆鐘鼓管絃之間而常患乎難知故為之官師為之學以聚天下之士期命辯說誦歌絃舞使之深知其意夫士牧民者也牧知地之所在則彼不知者驅之爾然士學而不知知而不行行而不至則奈何先王於是乎有政矣夫政非為勸沮而已也然亦

所以為勸沮故舉其學之成者以為卿大夫其次雖未成而不害其能至者以為士此舜所謂庸之者也若夫道隆而德駿者又不止此雖天子北面而問焉而與之迭為賓主此舜所謂承之者也蔽陷畔逃不可與有言則撻之以誨其過書之以識其惡待之以歲月之久而終不化則放棄殺戮之刑隨其後此舜所謂威之者也蓋其教法德則異之以智仁聖義忠和行則同之以孝友睦婣任恤藝則盡之以禮樂射御書數淫言詖行詭

怪之術不足以輔世則無所容乎其時而諸侯之所以教一皆聽於天子天子命之矣然後興學命之歷數所以時其遲速命之權量所以節其豐殺命不在是則上之人不以教而為學者不道也士之奔走揖讓酬酢笑語升降出入乎此則無非教者高可以至於命其下亦不失為人用其流及乎既衰矣尚可以鼓舞羣衆使有以異於後世之人故當是時婦人之所能言童子之所周知有後世老師宿儒之所惑而不悟者也武夫之所

道鄙人之所守有後世豪傑名士之所憚而愧之者也
堯舜三代從容無為同四海於一堂之上而流風餘俗
詠歎之不息凡以此也周道微不幸而有秦君臣莫知屈
已以學而樂於自用其所建立悖矣而惡夫非之者乃
燒詩書殺學士掃除天下之庠序然後非之者愈多而
終於不勝何哉先王之道德出於性命之理而性命之
理出於人心詩書能循而達之非能奪其所有而予之
以其所無也經雖亡出於人心者猶在則亦安能使人

舍己之昭昭而從我於瞶昏哉然是心非特秦也當孔子時既有欲毀鄉校者矣蓋上失其政人自為義不務出至善以勝之而患乎有為之難則是心非特秦也墨子區區不知失者在此而發尚同之論彼其為愚亦獨何異於秦嗚呼道之不一久矣揚子曰如將復駕其所說莫若使諸儒金口而木舌蓋有意乎辟雍學校之事善乎其言雖孔子出必從之矣今天子以盛德新即位庶幾能及此乎今之守吏實古之諸侯其異於古者不

在乎施設之不專而在乎所受於朝廷未有先王之法
度不在乎無所於教而在乎所以教未有以成士大夫
仁義之材處雖地曠以遠得所以教則雖悍昏嚚凶抵
禁觸法而不悔者亦將有以聰明其耳目而善其心又
况乎學問之民故余為書二侯之績因道古今之變及
所望乎上者使歸而刻石焉

繁昌縣學記

論學處亦最確

奠先師先聖於學而無廟古也近世之法廟事孔子而無學古者自京師至於鄉邑皆有學屬其民人相與學道藝其中而不可使不知其學之所自於是乎有釋菜奠幣之禮所以著其不忘然則事先師先聖者以有學也今也無有學而徒廟事孔子吾不知其說也而或者以謂孔子百世師通天下州邑為之廟此其所以報且尊榮之夫聖人與天地同其德天地之大萬物無可稱德故其祀質而已無文也通州邑廟事之而可以稱聖

人之德乎則古之事先聖何為而不然也宋因近世之法而無能改至今天子始詔天下有州者皆得立學奠孔子其中如古之為而縣之學士滿二百人者亦得為之而繁昌小邑也其士少不能中律舊雖有孔子廟而庠下不完又其門人之像惟顏子一人而已今夏君希道太初至則脩而作之具為子夏子路十人像而治其兩廡為生師之居以待縣之學者以書屬其故人臨川王某使記其成之始夫離上之法而苟欲為古之所為

者無法流於今俗而思古者不聞教之所以本又義之所去也太初是無變今之法而不失古之實其不可以無傳也

慈溪縣學記

予覽學記曾王二公為最非深於學不能記其學如此

天下不可一日而無政教故學不可一日而亡於天下古者井天下之田而黨庠遂序國學之法立乎其中鄉

射飲酒春秋合樂養老勞農尊賢使能攷藝選言之政
至於受成獻馘訊囚之事無不出於學於此養天下智
仁聖義忠和之士以至一偏一伎一曲之學無所不養
而又取士大夫之材行完潔而其施設已嘗試於位而
去者以為之師釋奠釋菜以教不忘其學之所自遷徙
偪逐以勉其怠而除其惡則士朝夕所見所聞無非所
以治天下國家之道其服習必於仁義而所學必皆盡
其材一日取以備公卿大夫百執事之選則其材行皆

已素定而士之備選者其施設亦皆素所見聞而已不待閱習而後能者也古之在上者事不慮而盡功不為而足其要如此而已此二帝三王所以治天下國家而立學之本意也後世無井田之法而學亦或存或廢大抵所以治天下國家者不復皆出於學而學之士羣居族處為師弟子之位者講章句課文字而已至其陵夷之久則四方之學者廢而為廟以祀孔子於天下斲木搏土如浮屠道士法為王者象州縣吏春秋帥其屬釋奠於

其堂而學士者或不預焉蓋廟之作出於學廢而近世之法然也今天子即位若干年頗脩法度而革近世之不然者當此之時學稍稍立於天下矣猶曰州之士滿二百人乃得立學於是慈溪之士不得有學而為孔子廟如故廟又壞不治今劉君在中言於州使民出錢將脩而作之未及為而去時慶厯某年也後林君肇至則曰古之所以為學者吾不得而見而法者吾不可以毋循也雖然吾之人民於此不可以無教即因民錢作孔

子廟如今之所云而治其四旁為學舍講堂其中帥縣
之子弟起先生杜君醇為之師而興於學噫林君其有
道者耶夫吏者無變今之法而不失古之實此有道者
之所能也林君之為其幾於此矣林君固賢令而慈溪
小邑無珍產淫貨以來四方遊販之民田桑之美有以
自足無水旱之憂也無遊販之民故其俗一而不雜有
以自足故人慎刑而易治而吾所見其邑之士亦多美
茂之材易成也杜君者越之隱君子其學行宜為人師

者也夫以小邑得賢令又得宜為人師者為之師而以脩醇一易治之俗而進美茂易成之材雖拘於法限於勢不得盡如古之所為吾固信其教化之將行而風俗之成也夫教化可以美風俗雖然必久而後至於善而今之吏其勢不能以久也吾雖喜且幸其將行而又憂夫來者之不吾繼也於是本其意以告來者

度支副使廳壁題名記

何等識見何等筆力

三司副使不書前人名姓嘉祐五年尚書戶部員外郎
呂君冲之始稽之衆史而自李紘已上至查道得其名
自楊偕已上得其官自郭勸已下又得其在事之歲時
於是書石而鐫之東壁夫合天下之衆者財理天下之
財者法守天下之法者吏也吏不良則有法而莫守法
不善則有財而莫理有財而莫理則阡陌閭巷之賤人
皆能私取予之勢擅萬物之利以與人主爭黔首而放
其無窮之欲非必貴強桀大而後能如是而天子猶為

不失其民者蓋特號而已耳雖欲食蔬衣敝憔悴其身
愁思其心以幸天下之給足而安吾政吾知其猶不得
也然則善吾法而擇吏以守之以理天下之財雖上古
堯舜猶不能毋以此為先急而況於後世之紛紛乎三
司副使方今之大吏朝廷所以尊寵之甚備蓋今理財
之法有不善者其勢皆得以議於上而改為之非特當
守成法各出入以從有司之事而已其職事如此則其
人之賢不肖利害施於天下如何也觀其人在其事

之歲時以求其政事之見於今者而考其所以佐上理財之方則其人之賢不肖與世之治否吾可以坐而得矣此蓋呂君之志也

撫州通判廳見山閣記

托通判與客相對之言而又托之書以為一篇文案

通判撫州太常博士施侯為閣於其舍之西偏既成與客升以飲而為之名曰見山且言曰吾人脫於兵火洗

沐仁聖之膏澤以休其父子者餘百年於今天子恭儉
陂池苑囿臺榭之觀有堙毀而無改作其不欲有所騷
動而思稱祖宗所以憫仁元元之意殊甚故人得私其
智力以逐於利而窮其欲自雖蠻夷湖海山谷之聚大
農富工豪賈之家往往能廣其宮室高其樓觀以與通
邑大都之有力者爭無窮之侈夫民之富溢矣吏獨不
當因其有餘力有以自娛樂稱上施耶又况撫之為州
山耕而水蒔牧牛馬用虎豹為地千里而民之男女以

萬數者五六十地大人衆如此而通判與之為之父母
則其人奚可不賢雖賢豈能無勞於為治獨無觀遊食
饗之地以休其暇日殆非先王使小人以力養君子之
意吾所以樂為之就此而忘勞者非以為吾之不肖能
長有此顧不如是不足以待後之賢者爾且夫人之慕
於賢者為其所樂與天下之志同而不失然後能有餘
以與民而使皆得其所願而世之說者曰召公為政於
周方春舍於蔽芾之棠聽男女之訟焉而不敢自休息

於宮恐民之從我者勤而害其田作之時蓋其隱約窮苦而以自媚於民如此故其民愛思而詠歌之至於不恐伐其所舍之棠今甘棠之詩是也嗟乎此殆非召公之實事詩人之本指特墨子之餘言贅行客細褊迫者之所好而吾之所不能為於是酒酣客皆歡相與從容譽施侯所為而稱其言之善又美大其閣而嘉其所以名之者曰閣之上流目而環之則邑屋草木川原阪隰之無蔽障者皆見施侯獨有見於山而以為之名何也

豈以山之在吾左右前後若蟠若踞若伏若驚為獨能
適吾目之所觀邪其亦吾心有得於是而樂之也施侯
以客為知言而以書抵予曰吾所以為閣而名之者如
此子其為我記之數辭不得止則又因吾叔父之命以
取焉遂為之記以示後之賢者使知夫施侯之所以為
閣而名之者其言如此

桂州新城記

荆公學本經術故其記文多以經術為案

儂智高反南方出入十有二州十有二州之守吏或死或不死而無一人能守其州者豈其材皆不足歟蓋夫城郭之不設甲兵之不戒雖有智勇猶不能以勝一日之變也唯天子亦以為任其罪者不獨守吏故特推恩褒廣死節而一切貸其失職於是遂推選士大夫所論以為能者付之經畧而今尚書戶部侍郎余公靖當廣西馬寇平之明年蠻越接和乃大城桂州其方六里其木甃瓦石之材以枚數之至四百萬有奇用人之力以

工數之至一十餘萬凡所以守之具無一求而有不給者焉以至和元年八月始作而以二年之六月成夫其為役亦大矣蓋公之信於民也久而費之欲以衛其材勞之欲以休其力以故為是有大費與大勞而人莫或以為勤也古者君臣父子夫婦兄弟朋友之禮失則夷狄橫而窺中國方是時中國非無城郭也卒於陵夷毀頓陷滅而不揀然則城郭者先王有之而非所以恃而為存也及至喟然覺悟興起舊政則城郭之脩也又嘗

不敢以為後蓋有其患而圖之無其具有其具而守之
非其人有其人而治之無其法能以久存而無敗者皆
未之聞也故文王之興也有四夷之難則城于朔方而
以南仲宣王之起也有諸侯之患則城于東方而以仲
山甫此二臣之德協於其君於為國之本末與其所先
後可謂知之矣慮之以悄悄之勞而發赫赫之名承之
以翼翼之勤而續明明之功卒所以攘戎狄而中國以
全安者蓋其君臣如此而守衛之有其具也今余公亦

以文武之材當明天子承平日久欲補弊立廢之時鎮撫一方脩扞其民其勤於今與周之有南仲仲山甫蓋等矣是宜有紀也故其將吏相與謀而來取文將刻之城隅而以告後之人焉至和二年九月丙辰羣牧判官太常博士王某記

荆川曰但為築城作記而歸之根本上說此是大議論

信州興造記

思周匝而亦巉畫

晉陵張公治信之明年皇祐二年也姦彊帖柔隱誅發舒既政大行得以寧息夏六月乙亥大水公徙囚於高獄命百隸戒不共有常誅夜漏半水破城滅府寺苞民廬居公趨譙門坐其下敕吏士以桴收民鰥孤老癯與所徙之囚咸得不死丙子水降公從賓佐按行隱度符縣調富民水之所不至者夫錢戶七百八十六收佛寺之積材一千一百三十有二不足則前此公所命富民

出粟以調貧民者二十三人自言曰食新矣調可以已
願輸粟直以佐材費七月甲午募人城水之所入垣羣
府之缺考監軍之室立司理之獄營州之西北亢爽之
墟以宅屯駐之師除其故營以時教士刺伐坐作之法
故所無也作驛曰饒陽作宅曰迴車築二亭於南門之
外左曰仁右曰智山水之所附也梁四十有二舟於兩
亭之間以通車徒之道築一亭於州門之左曰宴月吉
所以屬賓也凡為梁一為城垣九千尺為屋八以楹數

之得五百五十二自七月九日卒九月七日為日五十
八為夫一萬一千四百二十五中家以下見城郭室屋
之完而不知材之所出見徒之合散而不見役使之及
已凡故之所有必具其所無也迺今有之故其經費卒
不出縣官之給公所以揀災補敗之政如此其賢於世
吏遠矣今州縣之災相屬民未病災也且有治災之政
出焉弛舍之不適裒取之不中元姦宿豪舞手以乘民
而民始病病極矣吏乃始誓然自喜民相與誹且笑之

而不知也吏而不知為政其重困民多如此此子所以哀民而閔吏之不學也由是而言則為公之民不幸而遇害災其亦庶乎無憾矣十月二十日臨川王某記

餘姚縣海塘記

以謝景初所自言為領袖

自雲柯而南至於某有隄若干尺截然令海水之潮汐不得冒其旁田者知縣事謝君為之也始隄之成謝君以書屬予記其成之始曰使來者有考焉得卒任完之

以不隳謝君者陽夏人也字師厚景初其名也其先以文學稱天下而連世為貴人至君遂以文學世其家其為縣不以材自負而忽其民之急方作隄時歲丁亥十一月也能親以身當風霜氛霧之毒以勉民作而除其苗又能令其民翕然皆勸趨之而忘其役之勞遂不踰時以有成功其仁民之心效見於事如此亦可以已而猶自以為未也又思有以告後之人令嗣續而完之以永其存善夫仁人長慮却顧圖民之災如此其至其不

可以無傳而後之君子考其傳得其所以為其亦不可以無思而異時子嘗以事至餘姚而君過予與子從容言天下之事君曰道以闕大隱密聖人之所獨鼓萬物以然而皆莫知其所以然者蓋有所難知也其治政教令施為之詳凡與人共而尤丁寧以急者其易知較然者也通塗川治田桑為之隄防溝澮渠川以禦水旱之災而興學校屬其民人相與習禮樂其中以化服之此其尤丁寧以急而較然易知者也今世吏者其愚也固

不知所為而其所謂能者務出奇為聲威以驚世震俗至或盡其力以事刀筆簿書之間而已而反以謂古所為尤丁寧以急者吾不暇以為吾曾為之而曾不足以為之萬有一人為之且不足以名於世而見謂材嗜其可歎也夫為天下國家且百年而勝殘去殺之效則猶未也其不出於當時予良以其言為然既而聞君之為其縣至則為橋於江治學者以教養縣人之子弟既而又有隄之役於是又信其言之行而不予欺也已為之

書其隄事因并書其言終始而存之以告後之人慶厯八年七月日記

通州海門興利記

荆公之文本經術處多

余讀豳詩以其婦子饁彼南畝田畯至喜嗟乎豳之人帥其家人戮力以聽吏吏推其意以相民何其至也夫喜者非自外至乃其中心固有以然也既嘆其吏之能民又思其君之所以待吏則亦欲善之心出於至誠而

已蓋不獨法度有以毆之也以賞罰用天下而先王之俗廢有士於此能以幽之吏自為而不苟於其民豈非所謂有志者邪以余所聞吳興沈君興宗海門之政可謂有志矣既隄北海七十里以除水患遂大浚渠川醜取江南以灌義寧等數鄉之田方是時民之墊於海呻吟者相屬君至則寬禁緩求以集流亡少焉誘起之以就功莫不蹶蹶然奮其億而來也由是觀之苟誠愛民而有以利之雖創殘窮敝之餘可勉而用也況於力足

者乎興宗好學知方竟其學又將有大者焉此何足以
盡吾沈君之才抑可以觀其志矣而論者或以一邑之
善不足書之今天下之邑多矣其能有以遺其民而不
愧於幽之吏者果多乎不多則予不欲使其無傳也至
和元年六月六日臨川王某記

唐宋八大家文鈔卷八十七

欽定四庫全書

唐宋八大家文鈔卷八十八

明 茅坤 撰

臨川文鈔八

記

揚州新園亭記

簡而有法周而能解

諸侯宮室臺榭講軍實容俎豆各有制度揚古今大都

方伯所治處制度狹庠軍實不講俎豆無以容不以偏
諸侯哉宋公至自丞相府化清事省喟然有意其圖之
也今太常刁君實集其意會公去鎮鄆君即而考之占
府乾隅夷第而基因城而垣並垣而溝周六百步竹萬
箇覆其上故高亭在垣東南循而西三十軌作堂曰愛
思道僚吏之不忘宋公也堂南北鄉袤八筵廣六筵直
北為射埒列樹八百本以翼其旁賓至而享吏休而宴
於是乎在又循而西十有二軌作亭曰隸武南北鄉袤

四筵廣如之埒如堂列樹以鄉歲時教士戰射坐作之法於是乎在始慶厯二年十二月某日凡若干日卒功云初宋公之政務不煩其民是役也力出於兵材資於官之饒地瞰於公宮之隙成公志也噫揚之物與監東南所規仰天子宰相所垂意而選繼乎宜有若宋公者丞乎宜有若刁君者金石可弊此無廢已

芝閣記

荆公本色之佳處

祥符時封泰山以文天下之平四方以芝來告者萬數
其大吏則天子賜書以寵嘉之小吏若民輒錫金帛方
是時希世有力之大臣窮搜而遠采山農野老攀緣徂
棧以上至不測之高下至澗溪壑谷分崩裂絕幽窮隱
伏人迹之所不通往往求焉而芝出於九州四海之間
蓋幾於盡矣至今上即位謙讓不德自大臣不敢言封
禪詔有司以祥瑞告者皆勿納於是神奇之產銷藏委
翳於蒿藜榛莽之間而山農野老不復知其為瑞也則

知因一時之好惡而能成天下之風俗況於行先王之治哉太丘陳君學文而好奇芝生於庭能識其為芝惜其可獻而莫售也故閣於其居之東偏掇取而藏之蓋其好奇如此噫芝一也或貴於天子或貴於士或辱於凡民夫豈不以時乎哉士之有道固不役志於貴賤而卒所以貴賤者何以異哉此予之所以歎也

君子齋記

宋文之格不入西漢處正在此而宋人之所自以

為得亦在此

天子諸侯謂之君卿大夫謂之子古之為此名也所以
命天下之有德故天下之有德通謂之君子有天子諸
侯卿大夫之位而無其德可以謂之君子蓋稱其位也
有天子諸侯卿大夫之德而無其位可以謂之君子蓋
稱其德也位在外也遇而有之則人以其名予之而以
貌事之德在我也求而有之則人以其實予之而心服
之夫人服之以貌而不以心與之以名而不以實能以

其位終身而無謫者蓋亦幸而已矣故古之人以名為羞以實為慊不務服人之貌而思有以服人之心非獨如此也以為求在外者不可以力得也故雖窮困屈辱樂之而弗去非以夫窮困屈辱為人之樂者在是也以夫困窮屈辱不足以繫吾心為可樂也已河南裴君主簿於洛陽治齋於其官而命之曰君子裴君豈慕夫在外者而欲有之乎豈以為世之小人衆而躬行君子者獨我乎由前則失已由後則失人吾知裴君不為是也

金
卷八十八
亦曰勉於德而已蓋所以勝於其前朝夕出入觀焉思
古之人所以為君子而務及之也獨仁不足以為君子
獨智不足以為君子仁足以盡性智足以窮理而又通
乎命此古之人所以為君子也雖然古之人不云乎德
輜如毛毛猶有倫未有欲之而不得也然則裴君之為
君子也孰禦焉故余嘉其志而樂為道之

石門亭記

題雖小而議論却大

石門亭在青田縣若干里令朱君為之石門者名山也
古之人咸刻其觀遊之感緊留之山中其石相望君至
而為亭悉取古今之刻立之亭中而以書與其甥之壻
王某使記其作亭之意夫所以作亭之意其直好山乎
其亦好觀遊眺望乎其亦於此問民之疾憂乎其亦燕
閒以自休息於此乎其亦憐夫人之刻暴剝偃蹠而無
所庇障且泯滅乎夫人物之相好惡必以類廣大茂美
萬物附焉以生而不自以為功者山也好山仁也去郊

而適野升高以遠望其中必有槩然者書不云乎予耄
遜于荒詩不云乎駕言出遊以寫我憂夫環顧其身無
可憂而憂者必在天下憂天下亦仁也人之否也敢自
逸至即深山長谷之民與之相對接而交言語以求其
疾憂有其壅而不聞者乎求民之疾憂亦仁也政不有
小大不以德則民不化服民化服然後可以無訟民不
無訟令其能休息無事優遊以嬉乎古今之名者其石
幸在其文信善則其人之名與石且傳而不朽成人之

名而不奪其志亦仁也作亭之意其然乎其不然乎

鄞縣經遊記

縣令如此知非俗吏已

慶厯七年十一月丁丑余自縣出屬民使浚渠川至萬
靈鄉之左界宿慈福院戊寅升雞山觀碣工鑿石遂入
育王山宿廣利寺雨不克東辛巳下靈巖浮石湫之壑
以望海而謀作斗門于海濱宿靈巖之旌教院癸未至
蘆江臨決渠之口轉以入于瑞巖之開善院遂宿甲申

遊天童山宿景德寺質明與其長老瑞新上石望玲瓏
巖須猿吟者久之而還食寺之西堂遂行至東吳具舟
以西質明泊舟堰下食大梅山之保福寺莊過五峰行
十里許復具舟以西至小溪以夜中質明觀新渠及洪
水灣還食普寧院日下昃如林村夜未中至資壽院質
明戒桃源清道二鄉之民以其事凡東西十有四鄉鄉
之民畢已受事而余遂歸云

遊褒禪山記

逸興滿眼而餘音不絕

褒禪山亦謂之華山唐浮圖慧褒始舍於其址而卒葬之以故其後名之曰褒禪今所謂慧空禪院者褒之廬冢也距其院東五里所謂華山洞者以其乃華山之陽名之也距洞百餘步有碑仆道其文漫滅獨其為文猶可識曰花山今言華如華實之華者蓋音謬也其下平曠有泉側出而記遊者甚衆所謂前洞也由山以上五六里有穴窈然入之甚寒問其深則其好遊者不能窮

也謂之後洞余與四人擁火以入之愈深其進愈難而其見愈奇有怠而欲出者曰不出火且盡遂與之俱出蓋予所至比好遊者尚不能十一然視其左右來而記之者已少蓋其又深則其至又加少矣方是時予之力尚足以入火尚足以明也既其出則或咎其欲出者而予亦悔其隨之而不得極夫遊之樂也於是予有歎焉古人之觀於天地山川草木蟲魚鳥獸往往有得以其求思之深而無不在也夫夷以近則遊者衆險以遠

則至者少而世之奇偉瑰怪非常之觀常在於險遠而
人之所罕至焉故非有志者不能至也有志矣不隨以
止也然力不足者亦不能至也有志與力而又不隨以
怠至於幽暗昏惑而無物以相之亦不能至也然力足
以至焉於人為可譏而在已為有悔盡吾志也而不能
至者可以無悔矣其孰能譏之乎此余之所得也予於
仆碑又以悲夫古書之不存後世之謬其傳而莫能名
者何可勝道也哉此所以學者不可以不深思而慎取

之也四人者廬陵蕭君圭君王長樂王回深父余弟安國平父安上純父至和元年七月某日臨川王某記

撫州祥符觀三清殿記

紫巖

臨川之州城橫溪上西出出城之上有宮巋然溪之汙
汙流過其下東南之山皆在其門戶牕牖之間者曰祥
符觀觀之中有屋四注深五十五尺廣七十二尺陞之
高居深十八分之一楹二十有四門兩夾窻中象三旁

象二十有六者曰三清殿用其師之說以動人而能有此者曰道士黎自新出其力以歸於道士之說而卒成此者曰里之人鄧佺佺之子表故常與予遊予之歸表語其父之事而乞予文予不能拒也夫用其師之說以動人者道士也予力顧出道士下復何云哉

揚州龍興講院記

占地步

予少時客遊金陵浮屠慧禮者從予遊予既吏淮南而

慧禮得龍興佛舍與其徒日講其師之說嘗出而過焉
庫屋數十椽上破而旁穿側出而視後則榛棘出人不
見垣端指以語予曰吾將除此而宮之雖然其成也不
以私吾後必求時之能行吾道者付之願記以示後之
人使不得私焉當是時禮方丐食飲以卒日視其居枵
然余特戲曰姑成之吾記無難者後四年來曰昔之所
欲為凡百二十楹賴州人蔣氏之力既皆成蓋有述焉
噫何其能也蓋慧禮者予知之其行謹潔學博而才敏

而又卒之以不私宜成此不難也今夫衣冠而學者必曰自孔氏孔氏之道易行也非有苦身窘形離性禁欲若彼之難也而士之行可一鄉才足一官者常少而浮屠之寺廟被四海則彼其所謂材者寧獨禮耶以彼之材由此之道去至難而就甚易宜其能也嗚呼失之此而彼得焉其有以也夫

真州長蘆寺經藏記

識遠

西域有人焉止而無所繫觀而無所逐唯其無所繫故有所繫者守之唯其無所逐故有所逐者從之從而守之者不可為量數則其言而應之議而辨之也亦不可為量數此其書之行乎中國所以至於五千四十八卷而尚未足以為多也真州長蘆寺釋智福者為高屋建大軸兩輪而棲匭於輪間以藏五千四十八卷者其募錢至三千萬其土木丹漆珠璣萬金之閎壯靡麗言者不能稱也唯觀者知焉夫道之在天下莫非命而有廢

興時也知出之有命興之有時則彼所以當天下貧窶
之時能獨鼓舞得其財以有所建立每至於此蓋無足
以疑智福有才略善治其徒衆從余求識其成於是乎
書

大中祥符觀新修九曜閣記

某自揚州歸與叔父會京師叔父曰大中祥符觀所謂
九曜者道士丁用平募民錢為堂庖廡已又為閣置九
曜像其下從吾乞汝文記其年時汝為之臨川之城中

東有大丘左溪水水南出而北并於江城之東以溪為
隍吾廬當丘上北折而東百步為祥符觀觀岼溪水東
南之山不奄乎人家者可望也某少時固嘗從長者游
而樂之以為溪山之佳雖異州樂也況吾父母之州而
又去吾廬為之近者耶雖其身去為吏獨其心不須臾
去也今道士又新其居以壯觀游閣焉使游者得以窮
登望之勝使可望者不唯東南而已豈不重可樂邪道
士之所為幾吾之所樂而命吾文又叔父也即欲已得

邪惜乎安得與州之君子者游焉以忘吾憂而慰吾思
耶閣成之日某年月日也

撫州招僊觀記

小小結構自有遠山景態

招僊觀在安仁郭西四十里始作者與其歲月予不知
也祥符中嘗廢廢四五十年而道士全自明以醫游其
邑邑之疾病者賴以治而皆憂其去人相與言州出材
力因廢基築宮而留之全與其從者一人為留而觀復

興全識予舅氏而因舅氏以乞予書其復興之歲月夫
宮室器械衣服飲食凡所以生之具須人而後具而人
不須吾以足惟浮屠道士為然而全之為道士人須之
而不可以去也其所以養於人也視其黨可以無媿矣
予為之書其亦可以無媿焉慶歷七年七月復興之歲
月也

廬山文殊像現瑞記

亦奇

番陽劉定嘗登廬山臨文殊金像所沒之谷睹光明雲
瑞圖示臨川王某求記其事某曰有有以觀空空亦幻
空空以觀有幻亦實幻實果有辨乎然則如子所睹可
以記可以無記記無記果亦有辨乎雖然子既圖之矣
余不可以無記也定以熙寧元年四月十日十年九月
二十七日睹某以元豐元年十一月二十三日記

荆公之文其長在簡古而多深沈之思讀孟嘗
君傳與此等記尤可見

漣水軍淳化院經藏記

有韓旋處

道之不一久矣人善其所見以為教於天下而傳之後
世後世學者或徇乎身之所然或誘乎世之所趨或得
乎心之所好於是聖人之大體分裂而為八九博聞該
見有志之士補苴調劑冀以就完而力不足又無可為
之地故終不得蓋有見於無思無為退藏於密寂然不
動者中國之老莊西域之佛也既以此為教於天下而

傳後世故為其徒者多寬平而不忤質靜而無求不忤似仁無求似義當士之夸漫盜奪有已而無物者多於世則超然高蹈其為有似乎吾之仁義者豈非所謂賢於彼而可與言者邪若通之瑞新閩之懷璉皆今之為佛而超然吾所謂賢而與之遊者也此二人者既以其所學自脫於世之淫濁而又皆有聰明辯智之材故吾樂以其所得者間語焉與之遊忘日月之多也璉嘗謂余曰吾徒有善因者得屋於連水之城中而得吾所謂

經者五千四十八卷於京師歸市廛而藏諸屋將求能
文者為之書其經藏者之歲時而以子之愛我也故使
其徒來屬能為我強記之乎善因者蓋嘗為屋於漣水
之城中而因瑞新以求予記其歲時予辭而不許者也
於是問其藏經之日某年月日也夫以二人者與余遊
而善因屬我之勤豈有他哉其不可以終辭乃為之書
而并告之所以書之意使鑱諸石

唐宋八大家文鈔卷八十八

欽定四庫全書

集部

唐宋八大家文鈔卷八十九

九十

詳校官左中允_臣瑋五珠

侍讀_臣孫球覆勘

總校官檢討_臣何思鈞

校對官中書_臣溫汝适

謄錄監生_臣范從理

欽定四庫全書

唐宋八大家文鈔卷八十九

明 茅坤 撰

臨川文鈔九

論

周公論

論確而辨亦儘圓轉

甚哉荀卿之好妄也載周公之言曰吾所執贄而見者

欽定四庫全書

唐宋八大家文鈔
卷八十九

十人還贄而相見者三十人貌執者百有餘人欲言而請畢事千有餘人是誠周公之所為則何周公之小也夫聖人為政於天下也初若無為於天下而天下卒以無所不治者其法誠修也故三代之制立庠於黨立序於遂立學於國而盡其道以為養賢教士之法是士之賢雖未及用而固無不見尊養者矣此則周公待士之道也誠若荀卿之言則春申孟嘗之行亂世之事也豈足為周公乎且聖世之事各有其業講道習藝患日之

不足豈暇遊公卿之門哉彼遊公卿之門求公卿之禮者皆戰國之奸民而毛遂侯嬴之徒也苟卿生於亂世不能考論先王之法著之天下而惑於亂世之俗遂以為聖世之事亦若是而已亦已過也且周公之所禮者大賢與則周公豈唯執贄見之而已固當薦之天子而共天位也如其不賢不足與共天位則周公如何其與之為禮也子產聽鄭國之政以其乘輿濟人於溱洧孟子曰惠而不知為政蓋君子之為政立善法於天下則



天下治立善法於一國則一國治如其不能立法而欲
人人悅之則日亦不足矣使周公知為政則宜立學校
之法於天下矣不知立學校而徒能勞身以待天下之
士則不唯力有所不足而勢亦有所不得也或曰仰祿
之士猶可驕正身之士不可驕也夫君子之不驕雖閭
室不敢自慢豈為其人之仰祿而可以驕乎嗚呼所謂
君子者貴其能不易乎世也荀卿生於亂世而遂以亂
世之事量聖人後世之士尊荀卿以為大儒而繼孟子

者吾不信矣

伯夷論

行文好所論伯夷處猶未是千年隻眼

事有出於千世之前聖賢辯之甚詳而明然後世不深
考之因以偏見獨識遂以為說既失其本而學士大夫
共守之不為變者蓋有之矣伯夷是已夫伯夷古之論
有孔子孟子焉以孔孟之可信而又辯之反復不一是
愈益可信也孔子曰不念舊惡求仁而得仁餓於首陽

之下逸民也孟子曰伯夷非其君不事不立惡人之朝
避紂居北海之濱目不視惡色不事不肖百世之師也
故孔孟皆以伯夷遭紂之惡不念以怨不忍事之以求
其仁餓而避不自降辱以待天下之清而號為聖人耳
然則司馬遷以為武王伐紂伯夷叩馬而諫天下宗周
而恥之義不食周粟而為采薇之歌韓子因之亦為之
頌以為微二子亂臣賊子接迹於後世是大不然也夫
商衰而紂以不仁殘天下天下孰不病紂而尤者伯夷

也嘗與太公聞西伯善養老則往歸焉當是之時欲夷
紂者二人之心豈有異邪及武王一奮太公相之遂出
元元於塗炭之中伯夷乃不與何哉蓋二老所謂天下
之大老行年八十餘而春秋固已高矣自海濱而趨文
王之都計亦數千里之遠文王之興以至武王之世歲
亦不下十數豈伯夷欲歸西伯而志不遂乃死於北海
邪抑來而死於道路邪抑其至文王之都而不足以及
武王之世而死邪如是而言伯夷其亦理有不存者也

且武王倡大義於天下太公相而成之而獨以為非豈
伯夷乎天下之道二仁與不仁也紂之為君不仁也武
王之為君仁也伯夷固不事不仁之紂以待仁而後出
武王之仁焉又不事之則伯夷何處乎余故曰聖賢辯
之甚明而後世偏見獨識者之失其本也嗚呼使伯夷
之不死以及武王之時其烈豈獨太公哉

三聖人論

三聖人者各持其所見以自盡名天下而非以矯

也而其行文自可觀

孟子曰可欲之謂善有諸己之謂信充實之謂美充實而有光輝之謂大大而化之之謂聖聖之為名道之極德之至也非禮勿動非禮勿言非禮勿視非禮勿聽此大賢者之事也賢者之事如此則可謂備矣而猶未足以鑽聖人之堅仰聖人之高以聖人觀之猶太山之於岡陵河海之於陂澤然則聖人之事可知其大矣易曰與天地合其德與日月合其明與鬼神合其吉凶此蓋

聖人之事也德苟不足以合於天地明苟不足以合於
日月吉凶苟不足以合於鬼神則非所謂聖人矣孟子
論伯夷伊尹柳下惠皆曰聖人也而又曰伯夷隘柳下
惠不恭隘與不恭君子不由也夫動言視聽苟有不合
於禮者則不足以為大賢人而聖人之名非大賢人之
所得擬也豈隘與不恭者所得僭哉蓋聞聖人之言行
不苟而已將以為天下法也昔者伊尹制其行於天下
曰何事非君何使非民治亦進亂亦進而後世之士多

不能求伊尹之心者由是多進而寡退苟得而害義此其流風末俗之弊也聖人患其弊於是伯夷出而矯之制其行於天下曰治則進亂則退非其君不事非其民不使而後世之士多不能求伯夷之心者由是多退而寡進過廉而復刻此其流風末世之弊也聖人又患其弊於是柳下惠出而矯之制其行於天下曰不羞污君不辭小官遺佚而不怨阨窮而不憫而後世之士多不能求柳下惠之心者由是多污而寡潔惡異而尚同此

其流風末世之弊也此三人者因時之偏而救之非天下之中道也故久必弊至孔子之時三聖人之弊各極於天下矣故孔子集其行而制成法於天下曰可以速則速可以久則久可以仕則仕可以處則處然後聖人之道大具而無一偏之弊矣其所以大具而無弊者豈孔子一人之力哉四人者相為終始也故伯夷不清不足以救伊尹之弊柳下惠不和不足以救伯夷之弊聖人之所以能大過人者蓋能以身救弊於天下耳如皆

欲為孔子之行而忘天下之弊則惡在其為聖人哉是故使三人者當孔子之時則皆足以為孔子也然其所以為之清為之任為之和者時耳豈滯於此一端而已乎苟在於一端而已則不足以為賢人也豈孟子所謂聖人哉孟子之所謂隘與不恭君子不由者亦言其時爾且夏之道豈不美哉而殷人以為野殷之道豈不美哉而周人以為鬼所謂隘與不恭者何以異於是乎當孟子之時有教孟子枉尺直尋者有教孟子權以援天

下者蓋其俗有似於伊尹之弊時也是以孟子論是三
人者必先伯夷亦所以矯天下之弊耳故曰聖人之言
行豈苟而已將以為天下法也

季子論

確

先王酌乎人情之中以制喪禮使哀有餘者俯而就之
哀不足者企而及之哀不足者非聖人之所甚善也善
之者善其能勉於禮而已延陵季子其長子死既封而

號者三遂行孔子曰延陵季子之於禮其合乎夫長子之喪聖人為之三年之服蓋以謂父子之親而長者為親之後人情之所至重也今季子三號遂行則於先王之禮為不及矣今論者曰當是之時季子聘於齊將君之命若夫季子之心則以謂不可以私義而緩君命有勢不得以兩全者則當忍哀以徇於尊者之事矣今將命而聘既聘而返遂少緩而盡哭之哀則於事君之義豈為不足而害於使事哉君臣父子之義勢足以

兩全而不為之盡禮也則亦薄於骨肉之親而不用先王之禮爾其言曰骨肉歸復於土命也若魂氣則無所不之矣夫骨肉之復於土魂氣之無不之是人情之所哀者矣君子無所不言命至於喪則有性焉獨不可以謂命也昔莊周喪其妻鼓盆而歌東門吳喪其子比於未有此棄人齊物之道吾儒之罪人也觀季子之說蓋亦周吳之徒矣父子之親仁義之所由始而長子者繼祖考之重故喪之三年所以重祖考也今季子不為之

盡禮則近於棄仁義薄祖考矣孔子曰喪事不敢不勉也又曰臨喪不哀吾何以觀之哉臨人之喪而不哀孔子猶以為不足觀也况禮之喪三年者乎然則此言宜非取之矣蓋記其墓深不至於泉斂以時服既葬而封廣輪掩坎其高可隱孔子之稱之蓋稱其墓之合於禮爾獨稱墓之合於禮則哀之不足可知也衛有送葬者夫子觀之曰善哉此可以為法矣若此則夫子之所美也聖人之言辭隱而義顯豈徒然哉學者之所不可不

思也

子貢論

辨博

予讀史所載子貢事疑傳之者妄不然子貢安得為儒哉夫所謂儒者用於君則憂君之憂食於民則患民之患在下而不用則修身而已當堯之時天下之民患於洪水堯以為憂故禹於九年之間三過其門而不一省其子也回之生天下之民患有甚於洪水天下之君憂

有甚於堯然回以禹之賢而獨樂陋巷之間曾不以天下憂患介其意也夫二人者豈不同道哉所遇之時則異矣蓋生於禹之時而由回之行則是楊朱也生於回之時而由禹之行則是墨翟也故曰賢者用於君則以君之憂為憂食於民則以民之患為患在下而不用於君則修其身而已何憂患之與哉夫所謂憂君之憂患民之患者亦以義也苟不義而能釋君之憂除民之患賢者亦不為矣史記曰齊伐魯孔子聞之曰魯墳墓之

國國危如此二三子何為莫出子貢因行說齊以伐吳說吳以救魯復說越復說晉五國由是交兵或彊或破或亂或霸卒以存魯觀其言迹其事儀秦軫伐無以異也嗟乎孔子曰已所不欲勿施於人已以墳墓之國而欲全之則齊吳之人豈無是心哉奈何使之亂歟吾所以知傳者之妄一也於史考之當是時孔子子貢為匹夫非有卿相之位萬鍾之祿也何以憂患為哉然則異於顏回之道矣吾所以知其傳者之妄二也墳墓之國

雖君子之所重然豈有憂患而謀為不義哉借使有憂患為謀之義則豈可以變詐之說亡人之國而求自存哉吾所以知其傳者之妄三也子貢之行雖不能盡當於道然孔子之賢弟子也固不宜至於此矧曰孔子使之也太史公曰學者多稱七十子之徒譽者或過其實毀者或損其真子貢雖好辯詎至於此邪亦所謂毀損其真者哉

莊周論上

正當

世之論莊子者不一而學儒者曰莊子之書務詆孔子以信其邪說要焚其書廢其徒而後可其曲直固不足論也學儒者之言如此而好莊子之道者曰莊子之德不以萬物干其慮而能信其道者也彼非不知仁義也以為仁義小而不足行已彼非不知禮樂也以為禮樂薄而不足化天下故老子曰道失後德德失後仁仁失後義義失後禮是知莊子非不達於仁義禮樂之意也

彼以為仁義禮樂者道之末也故薄之云爾夫儒者之言善也然未嘗求莊子之意也好莊子之言者固知讀莊子之書也然亦未嘗求莊子之意也昔先王之澤至莊子之時竭矣天下之俗譎詐大作質朴並散雖世之學士大夫未有知貴已賤物之道者也於是棄絕乎禮義之緒奪攘乎利害之際趨利而不以為辱殞身而不以為怨漸漬陷溺以至乎不可救已莊子病之思其說以矯天下之弊而歸之於正也其心過慮以為仁義禮

樂皆不足以正之故同是非齊彼我一利害則以足乎
心為得此其所以矯天下之弊者也既以其說矯弊矣
又懼來世之遂實吾說而不見天地之純古人之大體
也於是又傷其心於卒篇以自解故其篇曰詩以道志
書以道事禮以道行樂以道和易以道陰陽春秋以道
名分由此而觀之莊子豈不知聖人者哉又曰譬如耳
目鼻口皆有所明不能相通猶百家衆技皆有所長時
有所用是以明聖人之道其全在彼而不在此而亦

自列其書於宋鉅慎到墨翟老聃之徒俱為不該不偏
一曲之士蓋欲明吾之言有為而作非大道之全云爾
然則莊子豈非有意於天下之弊而存聖人之道乎伯
夷之清柳下惠之和皆有矯於天下者也莊子用其心
亦二聖人之徒矣然而莊子之言不得不為邪說比者
蓋其矯之過矣夫矯枉者欲其直也矯之過則歸於枉
矣莊子亦曰墨子之心則是也墨子之行則非也推莊
子之心以求其行則獨何異於墨子哉後之讀莊子者

善其為書之心非其為書之說則可謂善讀矣此亦莊子之所願於後世之讀其書者也今之讀者挾莊以謾吾儒曰莊子之道大哉非儒之所能及知也不知求其意而以異於儒者為貴悲夫

莊周論下

補前篇不足處

學者詆周非堯舜孔子余觀其書特有所寓而言耳孟子曰說詩者不以文害辭不以辭害意以意逆志是為

得之讀其文而不以意原之此為周者之所以詆也周
曰上必無為而用天下下必有為而為天下用又自以
為處昏上亂相之間故窮而無所見其材孰謂周之言
皆不可措乎君臣父子之間而遭世遇主終不可使有
為也及其引太廟犧以辭楚之聘使彼蓋危言以懼衰
世之常人耳夫以周之才豈迷出處之方而專畏犧者
哉蓋孔子所謂隱居放言者周殆其人也然周之說其
於道既反之宜其得罪於聖人之徒也夫中人之所及

者聖人詳說而謹行之說之不詳行之不謹則天下弊
中人之所不及者聖人藏乎其心而言之略不略而詳
則天下惑且夫諄諄而後喻饒饒而後服者豈所謂可
以語上者哉惜乎周之能言而不通乎此也

九卦論

世之處困者什之八九其能參於九卦而不失
者千之一萬之一吾所以錄而存之

處困之道君子之所難也非夫智足以窮理仁足以盡

性內有以固其德而外有以應其變者其孰能無患哉
古之人有極天下之困而其心能不累其行能不移患
至而不傷其身事起而不疑其變者蓋有以處之也處
之之道聖人嘗言之矣易曰履以和行謙以制禮復以
自知恒以一德損以遠害益以興利困以寡怨井以辯
義巽以行權此其處之之道也夫君子之學至於是則
備矣宜其通於天下也然而猶困焉者非吾行之過也
時有利不利也蓋古之所謂困者非謂夫其行自困者

謂夫行足以通而困於命者耳蓋於此九卦者智有所不能明仁有所不能守則其困也非所謂困而其處困也疎矣夫惟深於此九者而能果以行之者則其通也宜而其困也有以處之惟其學之之素也且君子之行大矣而待禮以和仁義為之內而和之以禮則行之成也而理之實存乎謙謙者禮之所自起禮者行之所自成也故君子不可以不知履欲知履不可以不知謙夫禮雖發乎其心而其文著乎外者也君子知禮而已則

溺乎其文而失乎其實忘性命之本而莫能自復矣故
禮之弊必復乎本而後可以無患故君子不可以不知
復雖復乎其本而不能常其德以自固則有時而失之
矣故君子不可以不知恒雖能久其德而天下事物之
變相代乎吾之前如吾知恒而已則吾之行有時而不
可通矣是必度其變而時有損益而後可故君子不可
以不知損益夫學如此其至德如此其備則宜乎其通
也然而猶困焉者則向所謂困於命者也困於命則動

而見病之時也則其事物之變尤衆而吾之所以處之者尤難矣然則其行尤貴於達事之宜而適時之變也故辯義行權然後能以窮通而井者所以辯義異者所以行權也故君子之學至乎井巽而大備而後足以自通乎困之時孔子曰作易者其有憂患謂其言之足以通乎困之時也嗚呼後世之人一困於時則憂思其心而失其故行然卒至於不能自存也是豈有他哉不知夫九者之義故也

禮論

借荀卿之說而辨之而行文亦儘圓轉

嗚呼荀卿之不知禮也其言曰聖人化性而起偽吾是以知其不知禮也知禮者貴乎知禮之意而荀卿盛稱其法度節奏之美至於言化則以為偽也亦烏知禮之意哉故禮始於天而成於人知天而不知人則野知人而不知天則偽聖人惡其野而疾其偽以是禮興焉今荀卿以謂聖人之化性為起偽則是不知天之過也然

彼亦有見而云爾凡為禮者必誅其放傲之心逆其嗜欲之性莫不欲逸而為尊者勞莫不欲得而為長者讓擊蹠曲拳以見其恭夫民之於此豈皆有樂之之心哉患上之惡已而隨之以刑也故荀卿以為特刼之法度之威而為之於外爾此亦不思之過也夫斲木而為之器服馬而為之駕此非生而能者也故必削之以斧斤直之以繩墨圓之以規而方之以矩束聯膠漆之而後器適於用焉前之以銜勒之制後之以鞭策之威馳驟

舒疾無得自放而一聽於人而後馬適於駕焉由是觀之莫不刼之於外而服之以力者也然聖人捨木而不為器捨馬而不為駕者固亦因其天資之材也今人生而有嚴父愛母之心聖人因其性之欲而為之制焉故其制雖有以強人而乃以順其性之欲也聖人苟不為之禮則天下蓋將有慢其父而疾其母者矣此亦可謂失其性也得性者以為偽則失其性者乃可以為真乎此荀卿之所以為不思也夫狙猿之形非不若人也欲

繩之以尊卑而節之以揖讓則彼有趨於深山大麓而走耳雖畏之以威而馴之以化其可服邪以謂天性無是而可以化之使偽耶則狙猿亦可使為禮矣故曰禮始於天而成於人天則無是而人欲為之者舉天下之物吾蓋未之見也

禮樂論

中多名言行文處類荀卿

氣之所稟命者心也視之能必見聽之能必聞行之能

必至思之能必得是誠之所至也不聽而聰不視而明
不思而得不行而至是性之所固有而神之所自生也
盡心盡誠者之所至也故誠之所以能不測者性也賢
者盡誠以立性者也聖人盡性以至誠者也神生於性
性生於誠誠生於心心生於氣氣生於形形者有生之
本故養生在於保形充形在於育氣養氣在於寧心寧
心在於致誠養誠在於盡性不盡性不足以養生能盡
性者至誠者也能至誠者寧心者也能寧心者養氣者

也能養氣者保形者也能保形者養生者也不養生不足以盡性也生與性之相因循志之與氣相為表裏也生渾則蔽性性渾則蔽生猶志一則動氣氣一則動志也先王知其然是故體天下之性而為之禮和天下之性而為之樂禮者天下之中經樂者天下之和禮樂者先王所以養人之神正人氣而歸正性也是故大禮之極簡而無文大樂之極易而希聲簡易者先王建禮樂之本意也世之所重聖人之所輕世之所樂聖人之

所悲非聖人之情與世人相反聖人內求世人外求內
求者樂得其性外求者樂得其欲欲易發而性難知此
情性之所以正反也衣食所以養人之形氣禮樂所以
養人之性也禮反其所自始樂反其所自生吾於禮樂
見聖人所貴其生者至矣世俗之言曰養生非君子之
事是未知先王建禮樂之意也養生以為仁保氣以為
義去情却欲以盡天下之性修神致明以趨聖人之域
聖人之言莫大顏淵之問非禮勿視非禮勿聽非禮勿

言非禮勿動則仁之道亦不遠也耳非取人而後聽目
非取人而後視口非取諸人而後言也身非取諸人而
後動也其守至約其取至近有心有形者皆有之也然
而顏子且猶病之何也蓋人之道莫大於此非禮勿聽
非謂掩耳而避之天下之物不足以干吾之聽也非禮
勿視非謂掩目而避之天下之物不足以亂吾之明也
非禮勿言非謂止口而無言也天下之物不足以易吾
之辭也非禮勿動非謂止其躬而不動天下之物不足

以干吾之氣也天下之物豈特形骸自為哉其所由來
蓋微矣不聽之時有先聰焉不視之時有先明焉不言
之時有先言焉不動之時有先動焉聖人之門惟顏子
可以當斯語矣是故非耳以為聰而不知所以聰者不
足以盡天下之聰非目以為明而不知所以明者不足
以盡天下之視聰明者耳目之所能為而所以聰明者
非耳目之所能為也是故待鐘鼓而後樂者非深於樂
者也待玉帛而後恭者非深於禮者也蕢桴土鼓而樂

之道備矣燔黍捭豚污尊抔飲禮既備矣然大裘無文大輅無飾聖人獨以其事之所貴者何也所以明禮樂之本也故曰禮之近人情非其至者也曾子謂孟敬子君子之所貴乎道者三動容貌斯遠暴慢矣正顏色斯近信矣出辭氣斯遠鄙倍矣籩豆之事則有司存觀此言也曾子而不知道也則可使曾子而為知道則道不違乎言貌辭氣之間何待於外哉是故古之人目擊而道已存不言而意已傳不賞而人自勸不罰而人自畏

莫不由此也是故先王之道可以傳諸言効諸行者皆其法度刑政而非神明之用也易曰神而明之存乎其人默而存之不言而信存乎德行去情却欲而神明生矣修神致明而物自成矣是故君子之道鮮矣齋明其心清明其德則天地之間所有之物皆自至矣君子之守至約而其至也廣其取至近而其應也遠易曰擬之而後言議之而後動擬議以成其變化變化之應天人之極致也是以書言天之道莫大於洪範洪範之言

天人之道莫大於貌言視聽思大哉聖人獨見之理傳
心之言乎儲精晦息而通神明君子之所不至者三不
失色於人不失口於人不失足於人不失色者容貌精
也不失口者語默精也不失足者行止精也君子之道
也語其大則天地不足容也語其小則不見秋毫之末
語其強則天下莫能敵也語其約則莫能致傳記聖人
之遺言曰大禮與天地同節大樂與天地同和蓋言性
也大禮性之中大樂性之和中和之情通乎神明故聖

人儲精九重儀鳳凰修五事而闢陰陽是天地位而三
光明四時行而萬物和詩曰鶴鳴於九臯聲聞於天故
孟子曰我善養吾浩然之氣充塞乎天地之間楊子曰
貌言視聽思性所有潛天而天潛地而地也嗚呼禮樂
之意不傳久矣天下之言養生修性者歸於浮屠老子
而已浮屠老子之說行而天下為禮樂者獨以順流俗
而已夫使天下之人驅禮樂之文以順流俗為事欲成
治其國家者此梁晉之君所以取敗之禍也然而世非

知之也者何耶特禮樂之意大而難知老子之言近而易輕聖人之道得諸已從容人事之間而不離其類焉浮屠直空虛窮苦絕山林之間然後足以善其身而已由是觀之聖人之於釋老其遠近難易可知也是故賞與古人同而勸不同罰與古人同而威不同仁與古人同而愛不同智與古人同而識不同言與古人同而信不同同者道也不同者心也易曰苟非其人道不虛行昔宓子賤為單父宰而單父之人化焉今王公大人有

堯舜伊尹之勢而無子賤一邑之功者得非學術素淺而道未明歟夫天下之人非不勇為聖人之道為聖人之道者時務速售諸人以為進取之階今夫進取之道譬諸鈎索物耳幸而多得其數則行為王公大人若不幸而少得其數則裂逢掖之衣為商賈矣由是觀之王公大人同商賈之得志者也此之謂學術淺而道不明由此觀之得志而居人之上復治聖人之道而不捨焉幾人矣內而好愛之容蠱其欲外有便嬖之諛驕其志

向之所能者日已忘矣今之所好者日已至矣孔子曰
有顏回者好學不遷怒不貳過又曰吾見其進未見其
止也夫顏子之所學者非世人之所學不遷怒者求諸
己不貳過者見不善之端而止之也世之人所謂退顏
子之所謂進也人之所謂益顏子之所謂損也易曰損
先難而後獲顏子之謂也耳損於聲目損於色口損於
言身損於動非先難歟及其至也耳無不聞目無不見
言無不信動無不服非後得歟是故君子之學始如愚

人焉如童蒙焉及其至也天地不足大人物不足多鬼神不足為隱諸子之支離不足惑也是故天之高也日月星辰陰陽之氣可端策而數也地至大也山川丘陵萬物之形人之常產可指籍而定也是故星厯之數天地之法人物之所皆前世致精好學聖人者之所建也後世之人守其成法而安能知其始焉傳曰百工之事皆聖人作此之謂也故古之人言道者莫先於天地言天地者莫先乎身言身者莫先乎性言性者莫先乎精

精者天之所以高地之所以厚聖人所以配之故御人莫不盡能而造父獨得之非車馬不同造父精之也射人莫不盡能而羿獨得之非弓矢之不同羿精之也今之人與古之人一也然而用之則二也造父用之以為御羿用之以為射盜蹠用之以為賊

唐宋八大家文鈔卷八十九